



青蓮觴咏







青蓮觴咏

李白著
周履靖和

編主五雲王

編初成集書叢

咏 觴 蓮 青

中華民國二十五年六月初版

著 者 李 白

和 者 周 履 靖

發 行 人 王 雲 五

印 刷 所 商 務 印 書 館

發 行 所 商 務 印 書 館

上海及各埠

上海河南路

上海河南路

本館據夷門廣牘
本影印初編各叢
書。僅有此本。

青蓮觴咏目錄卷上

古樂府七首

將進酒

行路難二首

山人勸酒

把酒問月

楊叛兒

對酒

五言古詩二十四首

擬古四首

月下獨酌四首

尋魯城北范居士失道落蒼耳中見范置

酒摘蒼耳作

金陵鳳凰臺置酒

北山獨酌寄韋六

獨酌

秋浦清溪雪夜對酒客有唱鷓鴣者

春日獨酌二首

秋夜板橋浦泛月獨酌懷謝眺

遊謝氏山亭

下終南山過斛斯山人宿置酒

夜泛洞庭尋裴侍御清酌

春日醉起言志

對酒

待酒不至

嘲王歷陽不肯飲酒

獨酌清溪江石上寄權昭夷

秋浦

七言古一首

金陵酒肆留別

目錄卷下

歌十一首

襄陽歌

扶風豪士歌

白毫子歌

對雪醉後贈王歷陽

謝岑勛見尋就元丹丘對酒相待以詩見

招

翫月金陵城西孫楚酒樓達曙歌吹日晚
乘醉著紫綺裘烏紗巾與酒客數人棹
歌秦淮往石頭訪崔四侍郎

訓中都吏携斗酒雙魚於逆旅見贈

冬夜醉宿龍門覺起言志

携妓登梁王棲霞山孟氏桃園中

醉後贈從甥高鎮

金陵江上遇蓬池隱者

行八首

樂歌行和太白笑歌行韻

笑歌行

悲歌行

前有樽酒行二首

短歌行

客中行

對酒行

吟三首

梁園吟

玉壺吟

江上吟

五言律詩十首

對酒憶賀監二首

并序

對酒醉題屈突明府廳

見野草中有曰白頭翁者

陪宋中丞武昌夜飲懷古

在水軍宴韋司馬樓船觀妓

流夜郎至江夏陪長史叔及薛明府宴興

德寺南閣

送別

洞庭醉後送絳州呂使君流澧州

廣陵贈別

五言絕句九首

陪侍郎叔遊洞庭醉後三首

銅官山醉後絕句

九日龍山飲

九月十日即事

自遣

魯中都東樓醉起作

送殷叔

七言絕句二首

答湖州迦葉司馬問白是何人

山中與幽人對酌

青蓮觴咏卷之上

唐李太白著

明周履靖和

古樂府七首

將進酒

李太白

君不見。黃河之水天上來。奔流到海不復迴。君
不見。高堂明鏡悲白髮。朝如青絲暮成雪。人生
得意須盡歡。莫使金樽空對月。天生我材必有用。
千金散盡還復來。烹羊宰牛且爲樂。會須一

飲三百杯。岑夫子。丹丘生。進酒君莫停。與君歌
一曲。請君爲我側耳聽。鐘鼓饌玉不足貴。但願
長醉不願醒。古來聖賢皆寂寞。惟有飲者留其
名。陳王昔時宴平樂。斗酒十千恣譔謔。主人何
爲言少錢。徑須沽取對君酌。五花馬。千金裘。呼
兒將出換美酒。與爾同銷萬古愁。

和

周履靖

君不見。少時不樂老大來。芳春一去竟弗迴。君
不見。紅顏雙鬢堆綠髮。倏爾婆娑更白雪。偷得

浮生且爲歡。擎杯慷慨歌明月。人世功名亦何用。且做淵明歸去來。撫景看花成獨樂。興至狂歌飲百杯。月與日。沒復生。晝夜何肯停。人生駒過隙。耳畔趨趨總弗聽。衣錦佩玉豈云貴。終日醺然勝常醒。富貴榮華誠蝶夢。勤苦一生博虛名。嗤彼塵世不知樂。徒自勞形弗戲謔。悟其得失了餘生。不羨英雄惟愛酌。青驄馬。紫貂裘。我性弗嗜但嗜酒。沉醉能消萬斛愁。

行路難二首

李白

金樽清酒斗十千。玉盤珍羞直萬錢。停杯投箸不能食。拔劍四顧心茫然。欲渡黃河冰塞川。將登太行雪滿山。閑來垂釣碧溪上。忽復乘舟夢日邊。行路難。行路難。多岐路。今安在。長風破浪會有時。直掛雲帆濟滄海。

和

周履靖

金過北斗銀萬千。不肯探春費杖錢。桃花樹樹間楊柳。嬌紅嫩綠也徒然。將駕孤舟風滿川。欲涉終南霧漫山。且登漁艇漾淥水。一夜隨流到

月邊行路難行路難崎嶇道仍還在波濤洶湧
靜何時直欲乘槎汎東海

其二

有耳莫洗潁川水有口莫食首陽蕨含光混世
貴無名何用孤高比雲月吾觀自古賢達人功
成不退皆殞身子胥既棄吳江上屈原終投湘
水濱陸機雄才豈自保李斯稅駕苦不早華亭
鶴唳詎可聞上蔡蒼鷹何足道君不見吳中張
翰稱達士秋風忽憶江東行且樂生前一杯酒

何須身後千載名

和

一葉扁舟蕩碧水朝釣鱸魚晚採蕨閒身終日
混鷗鳧夜來枕簟看明月靜想當世英豪人營
營至老喪此身何如子房歸山去不及太公釣
渭濱二疏見機名節保陶潛高志棄官早范增
忠言若罔聞韓信功勞何足道君不見越中范
蠡欲全生載却西施湖上行歡然且醉尊前酒
飲酒賦詩遺清名

山人勸酒

蒼蒼雲松落落綺皓春風爾來爲阿誰蝴蝶忽然滿芳草秀眉霜雪顏桃花骨青髓綠長美好稱是秦時避世人勸酒相歡不知老各守麋鹿志耻隨龍虎爭歛起佐太子漢皇乃復驚顧謂戚夫人彼翁羽翼成歸來商山下泛若雲無情舉觴酌巢由洗耳何獨清浩歌望嵩嶽意氣還相傾

和

澗松青青峯月皓皓溪深谷窅絕軒車門徑悠
悠闕瑶草桃花千樹梅萬株陽和一動花開好
興來把酒對花神吸酒狂歌已忘老山間恒自
足嬾與世人爭但知魚鳥樂而無寵辱驚雙鬢
易染雪金丹何日成歲月弗我待春光不世情
啣杯得真樂顏酡心自清長嘯徹雲漢百杯還
可傾

把酒問月

青天有月來幾時我今停杯一問之人攀明月

不可得月行却與人相隨皎如飛鏡臨丹闕綠
煙滅盡清輝發但見宵從海上來寧知曉向雲
間沒白兔擣藥秋復春嫦娥孤悽與誰鄰今人
不見古時月今月曾經照古人古人今人若流
水共看明月皆如此唯願當歌對酒時月光長
照金樽裏

和

清宵氣爽把杯時山月皎皎欲翫之爲問丹桂
可能折但喜銀色恒追隨誰碾冰輪照玉闕碧

落輝光相映發舉頭仰看海嶠昇天曙仍從星
一沒娑婆靈樹幾千春廣寒崔嵬誰與鄰今年
原是舊年月翫月寧知是舊人人生變幻如逝
水貴賤賢愚皆同此一樽常喜共良朋高歌酩
酊清光裏

楊叛兒

君歌楊叛兒妾勸新豐酒何許最關人烏啼白
門柳烏啼隱楊花君醉留妾家博山爐中沉香
火雙煙一氣凌紫霞

和

我歌淵明詩婦斟桑落酒花向座中開鳥栖綠
楊柳栖柳復栖花聲色遍山家醉把沉檀爇寶
鴨繚繞紫氣如雲霞

對酒

蒲萄酒金叵羅吳姬十五細馬馱青黛畫眉紅
錦靴道字不正嬌唱歌玳瑁筵中懷裏醉芙蓉
帳裏柰君何

和

嗜旨酒輕綺羅尋芳日落蹇驢馱不冠不帶不
著靴啣杯興至還高歌吳姬勸酒弗覺醉花間
行樂能幾何

五言古詩二十四首

擬古四首

長繩難繫日自古共悲辛黃金高北斗不惜買
陽春石火無留光還如世中人即事已如夢後
來我誰身提壺莫辭貧取酒會四鄰仙人殊恍
惚未若醉中真

和

百年容易盡何事苦與辛
華屋盈珠玉難駐花
柳春浮萍無定止堪比塵中人
不似磐石固猶同夢裏身
詩酒從吾好合擬相爲鄰
金丹不足信此物未還真

其二

今日風日好明日恐不如
春風笑於人何乃愁
自居吹簫舞彩鳳酌醴鱸
神魚千金買一醉取
樂不求餘達士遺天地
東門有二疏愚夫同瓦

石有才知卷舒無事坐悲苦塊然涸轍鮒

和

風光在春日冬夏焉能如人生易聚散何必愁
苦居長嘯一鼓掌沽酒烹江魚醉來興無已擊
壤樂有餘於越稱范蠡漢代羨二疏三杯情少
暢百盞意自舒白眼看塵世徒爲溝澮鮒

其三

僊人騎綵鳳昨下閬風岑海水三清淺桃花一
見尋遺我綠玉杯兼之紫瓊琴杯以傾美酒琴

以閑素心一物非世有何論珠與金琴彈松杪
風杯勸天上月風月長相知世人何倏忽

和

謫仙恣豪吟騎鯨上碧岑高風不可挹仙人何
處尋弗如飲旨酒興到鼓瑟琴酒能陶真性琴
可涵道心浪傳有千歲徒言石變金把盞翫庭
花狂吟對山月花月足供歡美景毋輕忽

其四

月色不可掃客愁不可道玉露生秋衣流螢飛

百草日月終銷毀天地同枯槁螻蛄啼青松安
見此樹老金丹寧誤俗昧者難精討爾非千歲
翁多恨去世早飲酒入玉壺藏身以爲寶

和

愁來賴酒掃此意誰能道歡娛吸百杯抵醉眠
芳草三春萬木華秋至成枯槁花無兩月榮人
無百歲老何必學修真愚夫徒探討智者悟其
機行樂恨不早牀頭儲瓊漿猶勝積金寶

月下獨酌四首

花間一壺酒獨酌無相親舉杯邀明月對影成
三人月既不解飲影徒隨我身暫伴月將影行
樂須及春我歌月徘徊我舞影零亂醒時同交
歡醉後各分散永結無情遊相期邈雲漢

和

迂拙無他好惟與杯酒親月下臨花坐借花爲
主人香氣襲我衣清影覆我身行樂弗及時辜
負此芳春獨酌謾盤桓母令至生亂任教玉漏
催興高未云散山月解人歡清光滿霄漢

其二

天若不愛酒酒星不在天地若不愛酒地應無
酒泉天地既愛酒愛酒不愧天已聞清比聖復
道濁如賢賢聖既已飲何必求神仙三杯通大
道一斗合自然但得酒中趣勿爲醒者傳

和

開樽花下坐獨酌明月天綠蟻浮杯中甘列如
醴泉興狂至壺罄醕酌不知天竹林嵇阮輩至
今頌其賢暢飲李太白由來呼謫仙景仰高風

致意氣斯同然日夕成清賞無心翼後傳

其三

三月咸陽城千花晝如錦誰能春獨愁對此徑
須飲窮通與脩短造化夙所稟一樽齊死生萬
事固難審醉後失天地兀然就孤枕不知有吾
身此樂最爲甚

和

隋堤柳如金洛陽花似錦看花坐柳邊興至猖
狂飲貴賤與否泰由來自天稟不若醉芳春生

死誰能審陶然明月下卷石堪爲枕任人呼我
顛誰知我樂甚

其四

窮愁千萬端美酒三百杯愁多酒雖少酒傾愁
不來所以知酒聖酒酣心自開辭粟卧首陽屢
空飢顏回當代不樂飲虛名安用哉蟹螯卽金
液糟丘是蓬萊且須飲美酒乘月醉高臺

和

黃金雖百鎰何如酒盈杯撫景當劇飲清風林

間來明月豈常好奇花幾度開年華嗟易邁逝
水不復回及時弗行樂富貴皆徒哉精靈至物
化枯骨伴蒿萊且傾一樽酒優游歌月臺

尋魯城北范居士失道落蒼耳中見范置
酒摘蒼耳作

鴈度秋色遠日靜無雲時客心不自得浩漫將
何之忽憶范野人閑園養幽姿茫然起逸興但
恐行來遲城壕失往路馬首迷荒陂不惜翠雲
裘遂爲蒼耳欺入門且一笑把臂君爲誰酒客

愛秋蔬山盤薦霜梨他筵不下筋此席忘朝飢
酸棗垂北郭寒瓜蔓東籬還傾四五酌自誅猛
虎詞近作十日歡遠爲千載期風流自簸蕩謔
浪偏相宜酣來上馬去却笑高陽池

和

秋雲片片飛北塞鴈歸時晝長無一事此身何
爲之江水澄似練清光照芳姿散步曲徑間扶
杖自遲遲丹楓飄野岸鳧鷖集塘陂蒼耳沿道
路故將羅袂欺幽棲范居士啓戶却問誰愛尔

園中蔬復喜樹頭梨蔬能供綠酒梨消渴與飢
灼灼芙蓉媚叢叢菊滿籬開樽罄幽抱興歌竹
枝詞偶成此歡對後會安可期高懷與明月二
者皆得宜飲罷出門去風光勝習池

金陵鳳凰臺置酒

置酒延落景金陵鳳凰臺長波寫萬古心與雲
俱開借問往昔時鳳凰爲誰來鳳凰去已久正
當今日迴明君越義軒天老坐三台豪士無所
用彈絃醉金壘東風吹出花安可不盡杯六帝

沒幽草深宮冥綠苔置酒勿復道歌鐘但相催

和

昔聞金陵勝鳳凰集高臺乘興一追翫芳樽臺
上開朋儕賞幽致策馬歡笑來鳳凰解人意此
日當旋迴興俠空世界歌狂動上台大呼壺中
酒連吸三四疊二美知不易須當醉百杯荒丘
俱六朝宮殿長莓苔達者宜行樂莫待白髮催

北山獨酌寄韋六

巢父將許由未聞買山隱道存跡自高何憚去

人近紛吾下茲嶺地閑喧亦泯門橫群岫開水
鑿衆泉引屏高而在雲竇深莫能準川光晝昏
凝林氣夕淒繫於焉摘朱果兼得養玄牝坐月
觀寶書拂霜弄瑤軫傾壺事幽酌顧影還獨盡
念君風塵游傲爾令自晒

和

不隨年少遊買山成清隱數畝種秫田依稀愚
谷近悠悠隔俗塵人稀車轍泯蒼筠屋外圍碧
澗窓前引白雲停茅簷深徑路無準嵐氣日氤

氤氳聲哀且緊靜叅造化機石室究玄牝松下
聽濤聲瀟然鼓玉軫開樽獨自酌涼風吹不盡
君蹤遍滄海不返令吾哂

獨酌

春草如有意羅生玉堂陰東風吹愁來白髮坐
相侵獨酌勸孤影閑歌面芳林長松爾何知蕭
瑟爲誰吟手舞石上月膝橫花間琴過此一壺
外悠悠非我心

和

春光遍郊陌携壺坐花陰晴日空中度花影
上侵悠然成獨酌長嘯徹高林醉來情更逸
把盞對花吟酪酊眠芳草酡顏枕瑤琴渾忘
在宇宙復完太古心

秋浦清溪雪夜對酒客有唱鷓鴣者

披君貂襜褕對君白玉壺雪花酒上滅頓覺夜
寒無客有桂陽至能吟山鷓鴣清風動懸竹越
鳥起相呼持此足爲樂何煩笙與竽

和

身披毛褐褕醇醪喜盈壺對雪斟不止寒威頃
爾無桂陽來俠客生平善鷓鴣一曲賓主洽促
席歡相呼把酒賞麗曲何必聞笙竽

春日獨酌二首

東風扇淑氣水木榮春暉白日照綠草落花散
且飛孤雲還空山衆鳥各已歸彼物皆有託吾
生獨無依對此石上月長醉歌芳菲

和

春風吹麗景花草映晴暉幽禽鳴碧樹浪蝶繞
枝飛達哉陶五柳三月棄官歸吾亦無外慕詩
酒日相依興來持壺觴獨酌對芬菲

其二

我有紫霞想緬懷滄洲間思對一壺酒澹然萬
事閑橫琴倚高松把酒望遠山長空去鳥沒落
日孤雲還但恐光景晚宿昔成秋顏

和

欲遺塵世想開樽坐花間三杯愁可却一醉情

始閑高歌鶯和調醉眼看青山興至臨泉石薄
暮不知還憑誰云至樂豈若酡其顏

秋夜板橋浦汎月獨酌懷謝眺

天上何所有迢迢白玉繩斜低建章闕耿耿對
金陵漢水舊如練霜江夜清澄長川瀉落月洲
渚曉寒凝獨酌板橋浦古人誰可徵玄暉難再
得洒酒氣填膺

和

白日如車輪欲繫無長繩故人貽我酒味醇勝

蘭陵新蟾懸碧漢寒影漾江澄枝頭紅葉墜草
上玉露凝橋浦夜獨酌謝君何能徵且醉今宵
酒高風入我膺

遊謝氏山亭

淪老卧江海再歡天地清病閑久寂寞歲物徒
芬榮借君西池遊聊以散我情掃雪松下去捫
蘿石道行謝公池塘上春草颯已生花枝拂人
來山鳥向我鳴田家有美酒落日與之傾醉罷
弄歸月遙欣稚子迎

和

孤懷伴野鶴心共白雲清幽棲丘壑裏弗慕華
與榮詩酒陶真性泉石涵素情昔聞謝亭麗扶
杖曲徑行芳草澗邊綠山花亭畔生遊魚沫芳
沼好鳥枝頭鳴主人解我意留我綠酒傾醉歸
明月下山妻歡笑迎

下終南山過斛斯山人宿置酒

暮從碧山下山月隨人歸却顧所來徑蒼蒼橫
翠微相携及田家童稚開荆扉綠竹入幽徑青

蘿拂行衣歡言得所憩美酒聊共揮長歌吟松
風曲盡河星稀我醉君復樂陶然共忘機

和

終南還已暮林鳥天外歸漫涉崎嶇徑雲間吐
月微故人邀我宿竹下啓柴扉松陰覆古道花
氣襲人衣欣然憩石榻叙言杯酒揮但恨多離
別良會世所稀嶺猿發長嘯江鷗任忘機

夜泛洞庭尋裴侍御清酌

日晚湘水綠孤舟無端倪明湖漲秋月獨泛巴

陵西遇憩裴逸人巖居陵丹梯抱琴出深竹爲
我彈鶻雞曲盡酒亦傾北窓醉如泥人生且行
樂何必組與珪

和

蘭舟泛碧水來去任天倪波光涵月色自東復
徂西追尋裴侍御不憚勤航梯主人解我意漉
酒烹隻雞傾倒盡五斗酪酏渾似泥逢歡且盡
興豈羨冠簪珪

春日醉起言志

處世若大夢胡爲勞其生所以終日醉頽然卧
前楹覺來盼庭前一鳥花間鳴借問此何時春
風語流鶯感之欲嘆息對酒還自傾浩歌待明
月曲盡已忘情

和

浮生渾似夢塵世胡勞生日酣數斗酒潦倒花
前楹醒來猶喚酒幽禽枝上鳴兒童問誰鳥晴
春啼新鶯嬌聲如奏管美酒復滿傾鳥聲與花
色相對多留情

對酒

勸君莫拒杯春風笑人來桃李如舊識傾花向
我開流鶯啼碧樹明月窺金壘昨日朱顏子今
日白髮催棘生石虎殿鹿走姑蘇臺自古帝王
宅城闕閉黃埃君若不飲酒昔人安在哉

和

達人契酒杯惜歲弗復來名花如綺繡爲問幾
度開花開宜翫賞酒熟應滿壘及時貴行樂莫
待霜雪催蒿萊迷漢苑鹿豕遊楚臺秦宮與魏

闕荒蕪混塵埃興廢總如此不飲徒嗟哉

待酒不至

玉壺繫青絲沽酒來何遲山花向我笑正好銜
杯時晚酌東軒下流鶯復在茲春風與醉客今
日乃相宜

和

綠鬢易成絲縱飲猶云遲待酒不見至悞我當
良時酒至對花酌好鳥鳴在茲鳥音與高懷二
者欣得宜

嘲王歷陽不肯飲酒

地北風色寒雪花大如手笑殺陶淵明不飲杯
中酒浪撫一張琴虛栽五株柳空負頭上巾吾
於爾何有

和

家無儋石儲酒杯常在手還笑玉歷陽胡爲不
飲酒室中空壺觴苑內閒花柳一朝朱顏頹黃
金徒自有

獨酌清溪江石上寄權昭夷

秋浦

我携一樽酒獨上江祖石自從天地開更長幾
千尺舉杯向天笑天迴日西照未賴坐此石長
垂嚴陵釣寄謝山中人可與爾同調

和

條然超俗慮偶踞磯上石閒觀釣魚叟得魚幾
滿尺買魚歸家笑頽簷下斜照烹魚酌芳醪醉
後羨魚釣詠寄溪上人甘與漁同調

七言古詩一首

金陵酒肆留別

風吹柳花滿店香
吳姬壓酒喚客嘗
金陵子弟來相送
欲行不行各盡觴
請君試問東流水
別意與之誰短長

和

甕頭酒熟發馨香
客子登程取次嘗
三疊陽關歌未徹
勸君更進幾壺觴
俄驚殘照下林麓
應惜浮生不久長

青蓮觴咏卷之上終

青蓮觴咏卷之下

唐李太白著

明周履靖和

歌十一首

襄陽歌

落日欲沒峴山西倒着接羅花下迷襄陽小兒
齊拍手攔街爭唱白銅鞮傍人借問笑何事笑
殺山翁醉似泥鷓鴣杓鸚鵡杯百年三萬六千
日一日須傾三百杯遙看漢水鴨頭綠恰似葡

菊初醱醅此江若變作春酒壘麴便築糟丘臺
千金駿馬換小妾笑坐雕鞍歌落梅車傍側掛
一壺酒鳳笙龍管行相催咸陽市上嘆黃犬何
如月下傾金罍君不見晉朝羊公一片石龜頭
剝落生莓苔淚亦不能爲之墮心亦不能爲之
衰清風明月不用一錢買玉山自倒非人推舒
州杓力士鎗李白與爾同死生襄王雲雨今安
在江水東流猿夜聲

和

偶尋酒侶步村西酌我五斗路欲迷醉中漫歌
紫芝曲聲清恰似白銅鞮兒童路上撫掌笑笑
我酩酊渾如泥銀鑿落琥珀杯罄盡牀頭興未
止欲醉狂夫須百杯斗大黃金盈尺壁弗換甕
中新綠醅眼前一片荒草壠或是當年歌舞臺
不學少年乘駿騎還同逸客探芳梅今宵且盡
尊前酒應惜年華旦暮催壯士腰間佩寶劍何
似我輩酒滿壘君不見阿房宮闕高百尺咸陽
一炬生蒼苔言之不覺興感慨思之不覺令人

哀酒星醴泉咸歸我肺腑千鍾百竿何須推燃
楚竹烹茶鑿七碗玉腋清風生幾同張子乘槎
去致使後人流芳聲

扶風豪士歌

洛陽三月飛胡沙洛陽城中人怨嗟天津流水
波赤血白骨相撐如亂麻我亦東奔向吳國浮
雲四塞道路賒東方日出啼早鴉城門人開掃
落花梧桐楊柳拂金井來醉扶風豪士家扶風
豪士天下奇意氣相傾山可移作人不倚將軍

勢飲酒豈顧尚書期雕盤綺食會衆客吳歌趙
舞香風吹原嘗春陵六國時開心寫意君所知
堂中各有三千士明日報恩知是誰撫長劔一
揚眉清水白石何離離脫吾帽向君笑飲君酒
爲君吟張良未逐赤松去橋邊黃石知我心

和

春日陰霾迷黃沙觀之令人興嘆嗟壘壘城南
幾坟墓畚耕畝畝栽桑麻一樽綠醕日傾倒川
原悠悠一望賒綠樹陰陰集暮鴉芳菲幾樹碧

桃花柳綠桃紅成別墅弗羨當年豪士家山居
幽曠何用奇生平嗜酒志不移一飲幾斗過阮
籍賦詩百篇勝佗期狂來謾倣孫登嘯紫簫欲
學子晉吹熙熙鼓腹樂清時海鷗林鹿爲相知
俄然時勢不相似黃土掩覆知是誰歌白苧低
翠眉爲歡終日塵脫離岸白帽撫掌笑傾綠蟻
發長吟樹頭黃鳥伴幽獨泉石優游太古心

白毫子歌

淮南小山白毫子乃在淮南小山裏夜卧松下

雲朝飡石中髓小山連繇向江開碧峯巉巖綠
水迴余配白毫子獨酌流霞杯拂花弄琴坐青
苔綠蘿樹下春風來南牕蕭颯松聲起憑厓一
聽清心耳可得見未得親八公攜手五雲去空
餘桂樹愁殺人

和

醉里苧村梅顛子誅茅結屋長林裏朝採南山
芝暮煮白石髓柴門傍磳對竹開清流曲曲繞
戶迴放浪山水內猖狂啣酒杯醅醕不管堦上

苔卧倒枕石未醒來鶯聲睨睨時喚起飛瀑潺
潺聒兩耳鹿相伴鳥相親鶴書下辟何肯去甘
爲丘壑一散人

對雪醉後贈王歷陽

有身莫犯飛龍鱗有手莫辯猛虎鬚君看昔日
汝南市白頭仙人隱玉壺子猷聞風動窓竹相
邀共醉杯中綠歷陽何異山陰時白雪飛花亂
人目君家有酒我何愁客多樂酣秉燭遊謝尚
自能鸚鵡舞相如兔脫鷓鴣裘清晨鼓棹過江

去千里相思明月樓

和

遙天昨夜白雪飛清光掩映狂夫鬚四野漫漫
銀作屋呼童貰酒滿一壺朔風蕭瑟戛脩竹瓊
瑤片片堆蒼綠太白醉後贈歷陽歌之令人豁
雙目清樽泛蟻能銷愁何必追隨王子遊醉來
拂袖招鶴舞卧倒不脫黑狐裘頽然睡覺醉初
醒雪消天霽月滿樓

訓岑勛見尋就元丹丘對酒相待以詩見

招

黃鶴東南來寄書寫心曲倚松開其緘憶我腸
斷續不以千里遙命駕來相招中途元丹丘登
嶺宴碧霄對酒忽思我長嘯臨清飈蹇予未相
知茫茫綠雲垂俄然素書及解此長渴飢策馬
望山月途窮造堦墀喜茲一會面若覩瓊樹枝
憶君我遠來我歡方速至開顏酌美酒樂極忽
成醉我情既不淺君意方亦深相知兩相得一
顧輕千金且向山客笑與君論素心

和

瑤華來鴈足言言剖衷曲對使拆其封情與意
相續弗惜路迢迢貽書一見招丹丘忽邂逅開
宴歌雲霄歡然得共酌林杪來涼颺意洽情可
知憶我言念垂開緘一披覽脫粟療腹飢皎皎
天上月清光滿庭墀良晤喜茲夕如花滿芳枝
感君多好懷賞我佳興至潦倒同浮白暢飲成
大醉君意何更厚愧我敬未深道誼擬古昔交
情契蘭金不獨此夕嘉歲晚方見心

翫月金陵城西孫楚酒樓達曙歌吹日晚
乘醉著紫綺裘烏紗巾與酒客數人棹

歌秦淮往石頭訪崔四侍郎

昨翫西城月青天垂玉鈎朝沽金陵酒歌吹孫
楚樓忽憶繡衣人乘船往石頭草裹烏紗巾倒
被紫綺裘兩岸拍手笑疑是王子猷酒客十數
公崩騰醉中流謔浪棹海客喧呼傲陽侯半道
逢吳姬卷簾出椰榆我憶君到此不知狂與羞
一月一見君三杯便迴橈捨舟共連袂行上南

渡橋興發歌綠水秦君爲之謳雞鳴復相招清
宴逸雲霄贈我數百字字字凌風颺繫之衣裘
上相憶每長謠

和

金陵好佳境湘簾控金鉤城西沽美酒開樽白
玉樓捲簾呈夜色海月懸樹頭葛巾岸綠鬢牙
牀堆黑裘高懷讓李白幽興勝王猷飲酒如鯨
吸狂歌似水流呼盧忘晝夜慷慨輕公侯芳筵
遇秦女握手成椰掄溫顏低聲語羅袖掩嬌羞

崔君不易面駐楫停蘭橈浩然發長嘯艤舟東
画橋徜徉罄幾斗綠水相共謳參橫興復招俠
氣凌九霄天曙各分散石頭起涼飈貽我千餘
字摭爲長歌謔

訓中都吏携斗酒雙魚於逆旅見贈

李太白

魯酒若琥珀汶魚紫錦鱗山東豪吏有俊氣手
携此物贈遠人意氣相傾兩相顧斗酒雙魚表
情素雙鯁呀呷鱗鬣張趺刺銀盤欲飛去呼兒

拂机霜刃揮紅肥花落白雪霏爲君下筋一餐
飽醉著金鞍上馬歸

和

青罇浮綠蟻赤鯉呈錦鱗感謝騷客貽雅意白
衣持贈逆旅人爲問此日可相過剖魚傾酒話
平素此宵頗暇叙幽情倘尔更遷各分去官衙
聞寂杯可揮况值遙天雨霏霏拚取歡呼聲碧
甕藜牀一枕不須歸

冬夜醉宿龍門覺起言志

醉來脫寶劒旅憩高堂眠中夜忽驚覺起立明
燈前開軒聊直望曉雪河冰壯哀哀歌苦寒鬱
鬱獨惆悵傳說版築臣李斯鷹犬人歛起匡社
稷寧復長艱辛而我胡爲者嘆息龍門下富貴
未可期殷憂向誰寫去去淚滿襟舉聲梁甫吟
青雲當自致何必求知音

和

樗材難用世長夏北窓眠閒觀漢文選余詩不
及前卑棲休過望幽懷猶似壯五十一無聞此

心誠悵悵不願爲王臣甘作巖壑人半世罹艱
厄一生多苦辛自問如斯者三嘆茅簷下榮達
知何時衷腸不必寫思之淚沾襟賦記李白吟
憂懷賴此罄悽悽訴茲音

携妓登梁王棲霞山孟氏桃園中

碧草已滿地柳與梅爭春謝公自有東山妓金
屏笑坐如花人今日非昨日明日還復來白髮
對綠酒強歌心已摧君不見梁王池上月昔照
梁王樽酒中梁王已去明月在黃鸝愁醉啼春

風分明感激眼前事莫惜醉卧桃園東

和

白李與紅桃相持競芳春謾携窈窕秦樓女猶
勝東山勸酒人對花當劇飲老至少不來神衰
髮易白樹古枝欲摧君不見世人弗解悟旦暮
滾滾風塵中自古英雄有誰在不如把酒坐暄
風且盡尊前幾斗酒莫管身後西與東

醉後贈從甥高鎮

馬上相逢揖馬鞭客中相見客中憐欲邀擊筑

悲歌飲正值傾家無酒錢江東風光不借人枉
殺落花空自春黃金逐手快意盡昨日破產今
朝貧丈夫何事空嘯傲不如燒却頭上巾君爲
進士不得進我被秋霜生旅髮時清不及英豪
人三尺童兒重廉藺匣中盤劔裝鰓魚閑在腰
間未用渠且將換酒與君醉醉歸託宿吳專諸

和

金鞍駿騎玉爲鞭楚楚英才動客憐綺席謾張
山驛館情深何惜酒家錢江花岸柳撩行人陌

上猶逢爛熳春囊中黃金不足惜丈夫落落豈
畏貧狂來且罄酒幾斗潦倒卸却烏角巾君應
努力方始進博取烏紗稱綠髻世人誰不羨鄒
枚宇內俱聞廉與藺解下鷓鴣且換魚滿斟高
唱欲醉渠轟轟盡尔生平志還期氣量做專諸
金陵江上遇蓬池隱者

心愛名山遊身隨名山遠羅浮麻姑臺此去或
未返遇君蓬池隱就我石上飯空言不成歡強
笑惜日晚綠水向鴈門黃雲蔽龍山嘆息兩客

鳥徘徊吳越間共語一執手留連夜將久解我
紫綺裘且換金陵酒酒來笑復歌興酣樂事多
水影弄月色清光柰愁何明晨掛帆席離恨滿
滄波

和

欲入散人班遨遊豈憚遠倘入方壺中此身即
弗返蓬池喜遇君留餉胡麻飯玄談暢幽情不
覺天已晚猿聲嘯長林皎月將吐山繾綣何忍
別據梧松牖間意洽難分手徘徊相晤久將我

鼎內丹換取一斗酒傾樽發狂歌高懷此時多
蕩滌塵間垢曾中將如何曉來長揖去風帆颺
澄波

行八首

樂歌行和太白笑歌行韻

樂矣乎樂矣乎君不見綸與鈎扁舟把釣傲公
侯君不見琴無絃適意撫弄松窓邊茅屋三間
悠然臨碧澗且學子真谷口耕秫田樂矣乎樂
矣乎君不見慷慨謾歌淶水曲徜徉物外心自

足巖壑清幽可寄身遺世高蹈作閒人樂矣乎
樂矣乎漢時徐穉嚴君平隱居抱道不求名古
來高尚賢達士情閒瀟灑名猶成我儕弗沽名
性魯酷嗜酒一壺寄所樂榮辱我何有當歌把
酒須及時嵇康阮籍爲相知不願鼎烹太牢肉
亦非囊中脫穎錐樂矣乎樂矣乎穿古洞涉湖
濱曳屩持柯去採薪行歌鳥道得真樂却笑塵
中碌碌人

笑歌行

笑矣乎笑矣乎君不見曲如鉤古人知爾封公
侯君不見直如絃古人知爾死道邊張儀所以
只掉三寸舌蘇秦所以不墾二頃田笑矣乎笑
矣乎君不見滄浪老人歌一曲還道滄浪濯吾
足平生不解謀此身虛作離騷追人讀笑矣乎
笑矣乎趙有豫讓楚屈平賣身買得千年名巢
由洗耳有何益夷齊餓死終無成君愛身後名
我愛眼前酒飲酒眼前樂虛名何處有男兒窮
通當有時曲腰向君君不知猛虎不看機上肉

洪爐不鑄囊中錐笑矣乎笑矣乎甯武子朱買
臣叩角行歌背負薪今日逢君君不識豈得不
如佯狂人

悲歌行

悲來乎悲來乎主人有酒且莫斟聽我一曲悲
來吟悲來不吟還不笑天下無人知我心君有
數斗酒我有三尺琴琴鳴酒樂兩相得一杯不
啻千鈞金悲來乎悲來乎天雖長地雖久金玉
滿堂應不守富貴百年能幾何死生一度人皆

有孤猿坐啼墳上月且須一盡杯中酒悲來乎
悲來乎鳳凰不至河無圖微子去之箕子奴漢
帝不憶李將軍楚王放却屈大夫悲來乎悲來
乎秦家李斯早追悔虛名撥向身之外范子何
曾愛五湖功成名遂身自退劔是一夫用書能
知姓名惠施不肯千萬乘卜式未必窮一經還
須黑頭取方伯莫謾白首爲儒生

和

悲來乎悲來乎我生不悲喜酒斟飲酒不吟悲

來吟悲來仰天發長笑霽月光風賞我心牀頭
一甕酒榻上一張琴撫琴酌酒揔爲樂一刻清
閒抵萬金悲來乎悲來乎六尺軀終難久千頃
良田誰世守忽朝更易將柰何得失榮枯世所
有哀烏啼徹荒壠月不如生前一杯酒悲來乎
悲來乎功名有定何妄圖此生碌碌爲拙奴知
白守黑安我命落落翹然一丈夫悲來乎悲來
乎烏江項籍方始悔漁父不肯渡江外子房高
志入深山追從赤松身已退我拙世無用何必

遺虛名愧無奇策安邦國亦不苦志耽六經落
魄乾坤成樗朽自是世人呼狂生

前有樽酒行二首

春風東來忽相過金樽綠酒生微波落花紛紛
稍覺多美人欲醉朱顏酡青軒桃李能幾何流
光欺人忽蹉跎君起舞日西夕當年意氣不肯
平白髮如絲嘆何益

和

春花秋月夢裏過黃河之流無迴波歡娛日少

憂愁多且傾綠醕將顏酡韶光有限能幾何急
須行樂莫蹉跎日昇東忽已夕請君思之氣自
平碌碌塵中竟何益

其二

琴奏龍門之綠桐玉壺美酒清若空催絃拂柱
與君飲看朱成碧顏始紅胡姬貌如花當鑪笑
春風笑春風舞羅衣君今不醉將安歸

和

一輪皓月掛梧桐翫賞不放酒杯空一杯兩杯

愁盡掃三竿四竿顏已紅
狂來桐下嘯林杪飄涼風
飄涼風拂我衣我今不醉不言歸

短歌行

白日何短短百年苦易滿
蒼穹浩茫茫萬劫太極長
麻姑垂兩髻一半已成霜
天公見玉女大笑億千場
吾欲攬六龍迴車掛扶桑
北斗酌美酒勸龍各一觴
富貴非所願與人駐顏光

和

夜長苦晝短斟酒必須滿
世事任茫茫何計短

與長玄髮結高髻
修爾變雪霜
適遇好懷抱
亦入少年場
哀哉古賢墓
今已栽柔桑
勿爲永久計
逢酒吸千觴
爲問有何術
可能駐韶光

客中行

蘭陵美酒鬱金香
玉椀盛來琥珀光
但使主人能醉客
不知何處是他鄉

和

碧甕新篘竹葉香
謾傾磁盞泛清光
旅中倘得傾三斗
何必歸家訪醉鄉

對酒行

松子栖金華安期入蓬海此人古之仙羽化竟
何在浮生速流電倏忽變光彩天地無彫換容
顏有遷改對酒不肯飲含情欲誰待

和

陳搏隱華山張騫槎泛海二子皆悟道形質今
安在杲日昇復沉晴霞散五彩變幻亦無常人
事豈不改遇飲弗追歡韶光不相待

吟三首

梁園吟

我浮黃河去京闕挂席欲進波連山天長水闊
厭遠涉訪古始及平臺間平臺爲客憂思多對
酒遂作梁園歌却憶蓬池阮公詠因吟淶水揚
洪波洪波浩蕩迷舊國路遠西歸安可得人生
達命豈暇愁且飲美酒登高樓平頭奴子搥大
扇五月不熱疑清秋玉盤楊梅爲君設吳鹽如
花皎白雪持鹽把酒但飲之莫學夷齊事高潔
昔人豪貴信陵君今人耕種信陵墳荒城虛照

碧山月古木盡入蒼梧雲梁王宮闕今安在枚
馬先歸不相待舞影歌聲散綠池空餘汴水東
流海沉吟此事淚滿衣黃金買醉未能歸連呼
五白行六博分曹賭酒酣池輝歌且謠意方遠
東山高卧時起來欲濟蒼生未應晚

和

雙躅懶登黃金闕徙家棲隱九華山峯高澗曲
人跡少條然結屋蒼松間蒼松藹藹清風多把
酒松下歌長歌因思世態多更變人生自是江

上波不須名姓達上國飲酒哦詩真落得我生
放達不解愁興來秉筆賦登樓但知荷鍾劉伶
趣不學宋玉賦悲秋山妻烹葵爲我設再飲幾
觴歌白雪惟願一日醉十時不喜巢由矯其潔
慷慨好客孟嘗君哀哉麋鹿走荒墳寒烏啼徹
三更月宿草淒淒凝白雲當年富貴今何在古
塚蕭疎誰相待世人不識造化機萬頃良田變
爲海傷今弔古淚沾衣却喜五柳掛冠歸漉酒
賦詩全逸志東籬種菊挹清輝無絃琴音韻遠

白衣九日送酒來優游栗里樂歲晚

玉壺吟

烈士擊玉壺壯心惜暮年三杯拂劍舞秋月忽然高詠涕泗漣鳳凰初下紫泥詔謁帝稱觴登御筵揄揚九重萬乘主謔浪赤墀青瑣賢朝天數換飛龍馬敕賜珊瑚白玉鞭世人不識東方朔大隱金門是謫仙西施宜笑復宜嘖醜女效之徒累身君王雖愛蛾眉好無柰宮中妬殺人

和

心澄似冰壺興俠勝少年醉狂拔劍自起舞羅
袖翩翩映碧漣謾傾五斗桑落酒高歌潦倒樂
芳筵衣冠濟濟豪貴客輸却林泉隱者賢逍遙
不受樊籠縛落魄何愁利祿鞭狂來吸酒似劉
阮興至題詩擬浪仙生平懶把雙眉顰優游丘
壑樂閒身不如我輩縱旨酒醅酤白眼看世人

江上吟

木蘭之枻沙棠舟玉簫金管坐兩頭美酒樽中
置千斛載妓隨波任去留仙人有待乘黃鶴海

客無心隨白鷗屈平詞賦懸日月楚王臺榭空
山丘興酣落筆搖五嶽詩成笑傲凌滄洲功名
富貴若長在漢水亦應西北流

和

澄江悠悠蕩蘭舟拂拂涼風起渡頭美人二三
酒數斗楊柳磯邊少淹留吾志幽曠友麋鹿閒
心一片狎沙鷗厭聞俗事聒兩耳愁看白骨埋
荒丘數斗罄來窄宇宙一聲長嘯遍芳洲人生
渾似黃河水滔滔東逝無迴流

五言律詩十首

對酒憶賀監二首

并序

太子賓客賀公於長安紫極宮一見余
呼余爲謫仙人因解金龜換酒爲樂悵
然有懷而作是詩

四明有狂客風流賀季真長安一相見呼我謫
仙人昔好杯中物翻爲松下塵金龜換酒處却
憶淚沾巾

和

豪吟李太白性與句皆真知章逢邂逅傾蓋爲
故人一樽言闊別五斗掃俗塵不必金龜換何
須漉葛巾

其二

狂客歸四明山陰道士迎敕賜鏡湖水爲君臺
沼榮人亡餘故宅空有荷花生念此杳如夢淒
然傷我情

和

賀監家四明長安歡相迎此時對樽酒因思昔

日榮惟餘故人迹物化豈復生淒然賦新詩不
覺慟衷情

對酒醉題屈突明府廳

陶令八十日長歌歸去來故人建昌宰借問幾
時迴風落吳江雪紛紛入酒杯山翁今已醉舞
袖爲君開

和

愛菊陶元亮掛冠賦歸來爲問屈明府何時軒
蓋迴雪映松窓白寒光動王杯芳梅先報臘綠

萼向人開

見野草中有曰白頭翁者

醉入田家去行歌荒野中如何青草裏亦有白
頭翁折取對明鏡宛將衰髻同微芳似相諠留
恨向東風

和

田家春社散扶杖出林中陌上生奇卉人謂白
頭翁採之置山筐皜皜鶴髮同勿嫌頭盡白猶
自醉春風

陪宋中丞武昌夜飲懷古

清景南樓夜風流在武昌使公愛秋月乘興坐
胡床龍笛吟寒水天河落曉霜我心還不淺懷
古醉餘觴

和

秋半蟾光滿名公讌武昌金樽浮綠蟻玉露浥
銀床漏末參橫漢窓虛袂染霜瞻臨千古跡倚
馬更飛觴

在水軍宴韋司馬樓船觀妓

搖曳帆在空清流順歸風詩因鼓吹發酒爲歡
歌雄對舞青樓妓雙鬟白玉童行雲且莫去留
醉楚王宮

和

帆影蔽長空蘭橈趁晚風笙歌和調雅樽酒助
詩雄鬢綠如仙子顏紅勝女童今宵何必返扶
醉入深宮

流夜郎至江夏陪長史叔及薛明府宴興
德寺南閣

紺殿橫江上青山落鏡中岸迴沙不盡日映水
成空天樂流香閣蓮舟颺晚風恭陪竹林宴留
醉與陶公

和

琳宮江畔峙清影倒波中鐘磬聞紺宇幢幡颺
碧空佳賓翫明月芳席對涼風醕酎欲歸去禪
房別遠公

送別

斗酒渭城邊壚頭醉不眠梨花千樹雪楊葉萬

條烟惜別傾壺醕臨分贈馬鞭看君穎上去新
月到應圓

和

樽酒驛亭邊今宵拚不眠舟停猶痛飲江樹已
含烟傾竿還牽袂行驂未着鞭此時重分手何
日復團圓

洞庭醉後送絳州呂使君果流澧州

李太白

昔別若夢中天涯忽相逢洞庭破秋月縱酒開

愁容贈劒刻玉字延平兩蛟龍送君不盡意書
及鴈迴峯

和

列席洞庭中使君邂逅逢清樽舒旅况明月照
離容氣俠藏神劒情豪若海龍今宵送君去幽
夢遶千峯

廣陵贈別

金瓶沽美酒數里送君還繫馬垂楊下銜杯太
道間天邊看綠水海上見青山興罷各分袂何

須別醉顏

和

樽盈舊醕醪宴客廣陵邊一騎崎嶇外三杯繾
綣間凝眸望烟水回首憶家山此夕一爲別風
霜滿客顏

五言絕句九首

陪侍郎叔遊洞庭醉後三首

今日竹林宴我家賢侍郎三杯容小阮醉後發
清狂

和

洞庭期共泛此夕醉周郎恍入冰壺裏高歌思
欲狂

其二

船上齊橈樂湖心泛月歸白鷗閒不去爭拂酒
筵飛

和

月白明如晝人酣未肯歸夜深天籟寂獨鶴傍
船飛

其三

剗却君山好平鋪湘水流
巴陵無限酒醉後洞庭秋

和

鷗鳥沙頭集澄波載月流
此宵無盡興猶勝習池秋

銅官山醉後絕句

我愛銅官樂千年未擬還
要須迴舞袖拂盡五松山

和

銅官風物好不醉莫言還舞袖歌新調明蟾出
遠山

九日龍山飲

九日龍山飲黃花笑逐臣醉看風落帽舞愛月
留人

和

東籬有黃菊何肯爲侍臣對花傾數斗秋色伴
閒人

九月十日即事

昨日登高罷今朝更舉觴菊花何太苦遭此兩
重陽

和

登高情未已此日復持觴誰人知此意無日不
重陽

自遣

對酒不覺暝落花盈我衣醉起步溪月鳥還人
亦稀

和

山川適我興海月照我衣看月浮大白此味知
者稀

魯中都東樓醉起作

昨日東樓飲還應倒接羅阿誰扶上馬不省下
樓時

和

西樓同客飲興至岸接羅醉來忘去住不記別
君時

送殷淑

痛飲龍筇下燈青月復寒
醉歌驚白鷺半夜起沙灘

和

送客江邊酌風生襟袂寒
醉來歌一曲明月映前灘

七言絕句二首

答湖州迦葉司馬問白是何人

青蓮居士謫仙人酒肆藏名三十春
湖州司馬

何須問金粟如來是後身

和

白苧村南落魄人
耽詩縱酒度芳春
世間若問名和姓
五柳先生即此身

山中與幽人對酌

兩人對酌山花開
一杯一杯復一杯
我醉欲眠君且去
明朝有意抱琴來

和

山中野席爲君開
相對慙慙飲數杯
酒罷送君

歸去路知君何日得重來